

ISTITUZIONI

La Provincia à nominà la Comiscion paritetica

L'è stat costituì dò passa doi egn l'organism che cognessa tor dant l passaje de competenzes da Provincia e Region al Comun general de Fascia. Ma vèlch costion resta averta

La setemèna passèda la Jonta provinzièla à nominà la Comiscion paritetica che cogn troèr fora la competenzes de emportanza per la valorisazion de la mendranza linguistica ladina che pel ge vegnir dates sù al Comun General de Fascia.

La Provincia de Trent à enciarià de fèr pèrt de chest Desch l professor ordenèr de derit costituzionèl comparà de la facultà de Giurisprudenza de l'Università de Trent Jens Woelk, la dirigenta generèla del Departament

afares e relaziions istituzionèles de la PAT Valeria Placidi e la dirigenta generèla de la UMSE mendranzes linguistiches locales e Audit european (ex Servije mendranzes linguistiches) Giuliana Cristoforetti. Apede a si raprejentanc la PAT à ratifica la nomina di componenc portè dant da la Region e dal Comun general de Fascia, respetivamenter l Capo secretariat de l'Ofize de presidenza de la Region Matteo Migazzi e per l Comun General la Procuradora Elena Testor, l Conseier provinzièl Luca Guglielmi e Thomas Amplatz component del Consei general.

Che él e che cognela fèr chesta Comiscion?

L'è passà oramai 10 egn da canche l'è nasciù l Comun general de Fascia, metù sù desche ent con gran autonomia per poder portèr inant a na vida unitèra e percacenta l'endrez aministratif e politich de la val. Na gran endesfida e na gran ocajion, a nivel teorich, che ampò no à abù l'èjit sperà a nivel pratich, ajache te chisc egn, apede ai servijes sozièi, i servijes linguistics e la regoeta di refudames e di fonghes, che era jà gestiù adum dal Comprenjorie C11, la soula competenzes che l

Comun general l'è stat bon de jontèr ite l'è stat cheles di tribuc e di polins, che con fadia l'è stat passà dai Comus al CGF te la pruma legislatura. Dapò più nia. Ampò de dezember del 2017 l Comun general à fat n auter gran vèrech inant, amancol sul papier, con l recognosciment te la Lege Costituzionèla desche ent autonom, n ent nef respet a chi pervedui da l'art. 114 de la Costituzion, che à metù l'istituzion fascèna al segur dal pericol de vegnir touta jù descheche l'è stat fat con l'autra Comunitàdes de val del Trentin. N recognosciment de gran emportanza, arjont per enteressament de Bepe Detomas te la lege portèda dant da Daniel Alfreider.

Aldò de chest vèrech, per proèr a ge dèr contegnui a n ent local unich tel contest de l'ordenament giuridich talian, d'aisciuda del 2018 l medemo Detomas, enlouta Conseier ladin a Trent e con esperienza te la Comiscion di 12, aea portà na mozion te Consei provinzièl per l'istituzion de na Comiscion paritetica per l trasferiment de funziions e competenzes da la Provincia e la Region al Comun general de Fascia.

Chesta Comiscion, chiamèda enlouta Comiscion di 8 ajache la pervedea 2 componenc de la

Provincia, 2 de la Region e 4 del Comun general, la tolea ejempie da cheles di 6 e di 12, apontin con chela de formalisèr con na norma de atuazion i raporc anter istituziions recognosciudes e ressolver i aspec no sorii de chisc passajes da n ent a l'auter tel segn de la sussidiarietà, schivan ogne sort de conflit che aessa podù vegnir fora te l'aplicazion.

Detomas aea prejentà sia proponeta desche na vida per fèr de la Provincia de Trent n lech de sperimentazion virtuos e inovatif, de referiment per de altra realtèdes olache l'è de atualità l debatit su l'autonomia, e la mozion era stat aproèda duc a una. Ampò dapò l'è mudà la legislatura e la norma de atuazion é restèda te crigna.

N Desch de lurier trilateral

A sie post, endèna, l'è stat ipotisà n auter organism, n Desch de lurier trilateral anter CGF, PAT e Region normà a na vida più lijiera, demò con n at aministratif, per poder fèr più en prescia. Ampò sia costituzion no à abù i tempes curc pervedui. L'era la fin de mé del 2018 canche l Consei General aea aproà dut a una la mozion portèda dant dal grop de mendranza UAL per meter sù

chest Desch paritetich per dezider su la competenzes da ge passèr al Comun General. La Provincia à tout sù la domana ma l'è passà amò meisc e meisc inant che zeche se meve. Ai 27 de november del 2019 la PAT ge à domanà al Comun general de designèr si raprejentanc per poder meter sù te tempes curc chesta Comiscion paritetica, e l CGF con delibera del Consei de Procura di 10 de firè del 2020 l'ha nominà i trei componenc jà dic: Guglielmi, Testor e Amplatz: na nomina politica, a desferenza de chela tecnica de Provincia e Region, che à soscedà la reazion del grop de mendranza UAL percheche no la é stata portèda te Consei e percheche Amplatz, l'è stat nominà desche raprejentant de la mendranza senza nience sentir la medema UAL, maor grop de mendranza tel Consei general.

Ampò zacan la Comiscion é ativa e la se à jà scontrà en mèrtesc ai 28 de messèl. Se spera che la posse dèr na sburla tel passaje de competenzes al Comun general de Fascia, enceben che la nomines politiches lasce averta la costion che dò la litaziions chest organism podessa no esser più esprescion de l'ent che l cogn raprejentèr a na vida paritetica. 16